


奏疏卷之九 掌部

兵部尚書贈太子太保謚恭敏薛三才

奴酋攻陷撫順議處兵餉疏

臣承乏署部本月二十三日准遼東巡撫李維翰揭報題為點酋計陷孤城悍
虜聞風煽動等事正在具題間奉聖旨狡虜計陷邊城勢甚猖獗一切防勦事
宜行該地方官相機處置軍餉着上緊給發其調兵應援該部便酌議具奏李
維翰着用心料理疆事務保無虞欽此此不獨遼左震驚中外傳聞皆為動色
是疏朝上夕發仰見我皇上惕然東顧臣愚代庖樞務無能仰佐廟謨萬一惶
悚無地據遼撫疏報奴酋業已攻陷撫順盤據不去一城之內將領軍民橫罹
殺虜夫撫順互市之關奴酋歲貂參利不下數萬此中國所為操鈞餌以制馭



建夷者也今且公然攻陷我城堡殺虜我官民奴似無利此關市而甘與我為難矣先是夷稟輒以爭北關為名今盤踞撫順此其意蓋欲牽制我師直搗北關者也儻北關不守則開原遼陽一帶甯有幸哉且非獨此也據市夷稟報西虜煖宰等酋各馱帶盔甲於遼河兩岬下營討賞虎墩兔愁又傳調各夷會議犯搶而東虜抄花亦復糾集部落駐牧於鎮靜邊外或奴酋交結諸酋分投入犯以東西綴我亦未可知儻一時颯動左右牽制前後躉跋豈獨河東不支廣甯以西皆岌岌矣恃朝廷威福當不至此然勢已剝虜不得不為過計目前甚急着無如大發軍餉以鼓舞士氣遼軍缺餉已歷三時此非小小發數萬金便能濟事戶部應發額餉自昨秋至今夏計該五十餘萬太倉見貯無多即不能盡發亦須先發其半以濟燃眉臣部額該遼東馬價一十一萬七千八百餘兩

撫賞銀三萬兩除先發四萬外尚該銀十萬七千八百兩有奇併新兵餉銀四萬七千一百兩有奇臣請一頓解發此亦稍足應目前之急以慰遼軍望梅之意者也調兵一節方在酌議適督臣汪可受揭至內稱檄選薊鎮西協主客兵一千五百名中協主兵一千五百名東協主客兵二千名保定家丁五百名天津南兵一千名刻期至山海關便可計日度遼相為犄角矣撫臣請調近鎮精兵二三萬此尚不及什分之三薊當神京肘腋之地狡夷睥睨之秋恐勢不能多發宣大以西在在多事計亦不便於徵調且調兵於遠無當緩急惟有仰望皇上大發帑金聽遼東撫鎮自募敢戰之士急收此局防禦他變猶為費省功倍也往者宣鎮缺餉皇上不惜三十萬金以輯安饑卒消弭隱憂今遼軍缺餉甚於宣鎮撫順被陷事勢更迫聖明為畿左半壁計甯有靳乎督臣又援往

年征播州救朝鮮故事請費數百萬金錢調數省精兵為一勞永逸之計此真
安邊固圉長慮第欲徵兵必先議餉須集九卿科道諸臣熟計利便非臣愚所
敢徑請也伏乞乾斷立賜施行更乞嚴勅該鎮文武將吏殫智畢力收復陷城
防捍東西諸虜事勢稍定務養全力相機一創用雪此恥事結之日衡量功罪
以程賞罰庶幾東陲可保國威不損奉聖旨遼鎮悍虜猖獗所調應援兵馬該
用軍餉見今內帑空虛爾部便將馬價等銀照數給發以濟急用戶部應發餉
銀也着儘力措處不得遲悞該鎮文武官務要殫心協謀收復陷城共圖扞禦
之策事完分別賞罰如有疎虞必罪不宥其大舉征剿事還着九卿科道官會
議具奏

遼左陷師乞急救援疏

日者奴酋突襲撫順分兵四掠遼瀋之間在在告急督撫諸臣亟請援兵且議
大剿臣等熟念兵食猝難措處懇請發帑募兵為應援遼左之計特屢聖慮蹶
然東顧立命九卿科道官會議具奏臣等正在集議各紆著籌期以仰佐廟算
而遼左羽書接踵繼至始報東川馬根單二堡與撫順同日見尅猶謂倉卒無
備突然陷失廣甯兵馬相為連絡猶可成率然之勢為收復之圖忽於二十六
日戌時接撫臣李維翰塘報內稱本月二十三日卯時據坐營遊擊梁汝貴差
夜不收李千口報二十一日四更時本官會同各將領帶領兵馬分為五路追
趕至撫順城內橫河沿達賊望見兵馬即發火起身兵馬就從撫順兩夾馬追
趕離堡十里辰時出境梁遊擊領兵追至邊牆口外下營達賊亦在山頭下營

等情二十四日辰時據邸報林江口報本月二十一日未時奴酋率兵復回分為三路進入時有總兵張承胤即分兵列營三處與賊對敵因彼賊勢衆不能拒堵致將總兵張承胤并各將領砍殺落馬全軍覆沒等因到臣臣等不覺相顧失色共嘆遼事之壞一至此乎蓋緣一日之間三堡陷失將士同讐不勝羞憤急欲一戰冀以雪恥除克不圖衆寡不敵遂至全軍俱覆也夫此覆沒諸軍皆正標營挑選精銳與諸將慣戰家丁所謂以一當十摧鋒陷陣之士也同時併命慘若長平之阨諸嬰城自守者有不聞而股慄哉度此時勢全遼皆為震恐脫或諸虜乘虛而入東事殆有不忍言者除一切措處兵食及防禦事宜臣等遵旨會議另奏外云云奉聖旨遼左佐覆軍隕將虜勢益張邊事十分危急爾部便會推堪任總兵一員令刻期到任料理軍務一應禦防禦驅剿事宜着

奏督撫等官便宜調度務期殄滅以奠封疆其徵兵轉餉等事即便遵旨會議具

會推遼鎮疏

職方清吏司案呈照得遼東巡撫李維翰塘報鎮守遼東總兵張承胤陣亡等因送司案呈到部正在會官推補間隨奉聖諭朕覽輔臣揭奏據遼東巡撫塘報總兵張承胤禦虜陣亡全軍覆沒遼事深有可虞爾部便會推堪任總兵官一員令刻期任事紓朕東顧之憂故諭欽此該臣會同後軍都督府掌府事英國公張 等吏部署掌部事戶部尚書李汝華等從公推舉得原任鎮守甯夏總兵官右都督李如柏協守遼東西路副總兵李光榮俱各堪任伏乞於內簡命一員如用李如柏起以原官掛印充鎮守遼東兼備倭總兵官如用李光榮量陞署都督僉事充總兵官遺下員缺另行推補除臣部一面馬上差人劄催星夜赴任督率各路兵馬相機防禦所有本官原擬責任制勅各一道

臣部一面另請齎給其符驗旗牌印信就彼查收云
奉聖旨是李如柏起以原官掛印充鎮守遼東兼備倭總兵官寫勅制與他
着星夜赴任料理邊事

會議遼事疏

該本部等衙門會題職方清吏司案呈該本部題為點奴計陷孤臣悍虜聞風
煽動等事又該薊遼督臣汪可受題為遼左告急酌調薊保援兵等事奉聖旨
該鎮虜情甚急各處援兵相應刻期調發糧餉着多方措處無致缺乏會議已
有旨了該部知道欽此又該本部題為奴酋計殺官兵全軍覆沒事等因奉聖
旨遼左覆軍隕將虜勢益張邊事十分危急爾部便會推堪任總兵一員令刻
期到任料理軍務一應防禦驅勦事宜着督撫等官便宜調度務期殄滅以奠
封疆其徵兵轉餉等事即遵旨會議具奏欽此欽遵案呈到部除總兵已經會
推糧餉咨戶部儘力措處馬價撫賞新兵餉銀劄付太僕寺照數解發援兵咨
該鎮督臣調發外所有大舉征勦徵兵轉餉一節臣請遵旨於本月二十七日

會集九卿科道各官會議得奴酋憑陵遼左至於陷城尅堡隕將覆軍如火燎原幾不可嚮邇加以煖宰抄愁諸酋乘隙而動在在貼危遼之猛將精兵已喪於頃日之一戰今即欲嬰城自守恐亦人無固志轉餉徵兵如救焚拯溺時難刻緩宣大以西虜警未息閩浙之間島氛方熾無論兵難輕調譬之遠水何救近火不如就近召募為便遼河東西督臣業已下令分募真順河保之間故多燕趙慷慨之氣若行令各州縣分投召募壯士萬餘人旦夕可致合以遼東所募者約可得三萬餘人再行各邊督撫許令罪廢將官凡蓄有家丁叅遊百名以上守備五十名以上皆得効用軍前沿途行糧俱官為資給如攜帶五百名以上驗果精銳可用者比于起廢之例即與現缺如此招徠亦可得數千人又山海關為遼薊門戶關繫更重目今須得一大將提兵彈壓之兼為遼左聲援

保定猶是腹裏可令總兵王宣挑選保河健兵數十移駐關內合以督臣先所調薊保兵六千五百人幾可二萬合前召募之數共可得五萬人此雖未敢輕言搗薊首尾絡連以助遼軍捍禦則不乏矣總計用兵五萬內除萬餘調遣者止支行糧其新募四萬餘有安家之費有月糧之費又馬步相兼有買馬草料之費大約用兵五萬人馬之費歲計不下六七十萬今以泉府告竭未易猝辦先議糧餉銀一百萬內派戶部太倉十萬太僕寺馬價二十萬而工部之二十萬請徑於大工銀內動支合得五十萬此外五十萬不能不仰望於內帑也鼓舞士氣實在此舉至於馬匹行令太僕寺轉行寄養各州縣揀選三千匹徑解總督衙門充給募軍亦足省買馬之什一耳大抵今日時勢遼事方難欲收全勝之局不得不大為徵發顧民力已竭復重困以軍興之役勢必至於驛騷惟

是兵從近募則不煩羽書而應援不患於無兵餉從中發則不事繭絲而轉輸不患於無餉此今日議兵餉之大端也臣等更相計議遼左之事恐非旦夕能定督臣遙制千里之外則呼吸難通撫臣兼理米鹽之細則精神不一往年朝鮮洮河之役皆另設一經畧大臣為其青專而勢便也今遼事方急似當特設一經畧憲臣防剿機宜悉以聽之事平則撤而山海關亦特設一總兵駐劄其地即以山海路兵馬及新募兵五千屬之西捍薊東蔽遼亦隱然虎豹在山之勢也原任總兵杜松忠勇敢戰克稱斯任總之有事不得不添設猝有緩急可就近調遣耳謹述臣等會議之概具疏上聞伏乞聖明即賜乾斷施行

奉聖旨這募兵給餉等事備每既會議停當俱依議行帑銀知道了經畧憲臣着作速會推杜松准以原官起用駐劄山海關催他星夜前來毋得遲悞

東事緩急該部還馬上差人不時探報

議請督臣移駐關東疏

頃者奴酋猖獗遼左震驚致屢皇上東顧之慮立勅臣等會議防禦機宜一切請發錢糧徵調兵馬及添設經畧總兵等項俱蒙報可施行督臣汪可受誼奮纓冠先移駐山海關內則經畫兵食外則指麾軍旅諸所以離散西虜連綴北關計以捍遼安薊者固已不遺餘策矣臣等會議時亦謂山海為畿右咽喉督臣正合駐劄其地可以適中調度更議添設一總兵以備出關應援蓋所以固門戶重堂奧也適接御史熊化揭帖內稱聞虜衆薄瀋陽去遼陽止數舍盼望援兵不能旦夕俟經畧重臣提師入境非旬月不能至宜速發糧餉資督臣先擁數千之衆刻期出關直抵遼陽與新鎮臣李如柏協力拒守以待經畧師至徐圖方畧以規進取而順天撫臣則移駐山海關保定撫臣移駐易州相為接

應以護守近郊東關不屹然金湯乎臣展讀一二更熟計之勢有輕重時有緩急在居平則薊門咫尺陵京督臣當鎖鑰之寄於勢為重在今日則遼陽迫近奴虜京師有門庭之憂於時為急督臣駐劄關內距遼瀋千里戰守機宜變於呼吸勢難遙制且遼人望救朝不及夕一聞督師擁衆出關先聲所播亦足壯其膽氣此應急之着也而順保撫臣移鎮山海易州互為輔車復不失居重之意况山海又移保鎮總兵駐劄其地牖戶綢繆未嘗不密計慮更長本日會推宣府巡撫會議諸臣俱集關下與道臣熊化更端辯問卒無以難其說臣因而贊決之謹以上聞督臣未奉明旨不敢擅出山海伏乞聖明即勅督臣再擁數千兵馬刻期出關駐劄廣甯審察東西夷虜緩急之數勢相機調度撫臣李維翰移駐遼陽與新鎮臣李如柏協力捍禦更約束諸將務以保境固圉為事毋

再輕發以危遠為孤注也薊保先所發兵已六千五百人今督臣再挑數千出關內地空虛不無可慮臣部已移咨順保二撫臣分投召募亟補前額二撫臣殫忠竭智誼不後於督臣自足紓皇上東顧之念矣

奉聖旨督臣出關調度事出創見似難輕舉爾部既與多官議妥汪可受着統兵前去相機進止務期持重以保萬全撫臣李維翰着視虜情緩急再為移鎮其順天保定巡撫依議駐劄山海易州互相應援內地空虛可慮着速行召募充補仍嚴督文武將使用心加謹防禦以備他虞

調發登州南京水陸官兵疏

職方清吏司案呈照得遼自撫順殘破主帥覆沒勇將精兵幾於一空以戰以守兩無所據適接開原兵備道馮瑗揭稱西虜備木梯等攻具在十方寺等處入犯應援兵馬多多益善查得山東登朝州文登即墨三營額設捕倭南兵三千二百員名又南京兵部先年召募水陸二營兵六千名萬曆二十五年曾調水兵征倭今陸兵三千亦可循例調用乞題請調發水陸並進以資應援等因到部該臣看得遼左在在孤危調兵應援不須再計原議五萬半多募兵恐尚不足接濟案查登州等三營堪戰南兵二千三百七十四員名南京陸名營三千名俱係附近久練之卒登萊兵航海而進數日可抵旅順遼陽南營兵防倭有例不出月餘亦可從陸繼進計無有便於此者既經該司查呈前來相應題

請合候命下容臣一面移咨南京兵部及操江山東巡撫衙門一面馬上差人守催在登州等三營兵內挑選一千五百名即以原領千總等官或彼中撫道另選堪用官員管押從海道度遼聽彼中調遣其航海船隻器械及舟師舵工等費既係防倭地方應有額例錢糧設法取用官軍行糧即於各軍應得月糧之內預支兩個月抵給文到之日該道府官即行措處給發不得拘攣悞事南京陸營兵亦要滿足三千不足則于水營中挑補聽該部選委智勇善戰不拘見任罷閒叅遊等官一員及原領千把等官管押前來行糧照征倭事例於南京戶部給發二處官軍俱要各帶盔甲火器依限赴援不許逗遛觀望事平之日仍發回原伍有功官兵一體陞賞伏乞聖明立斷施行

奉聖旨是遼鎮孤危援兵難緩登州等營水兵并南陸兵都着速赴應援刻

期出關聽督撫調遣不許逗遛觀望事平一體陞賞

覆直隸巡按劾奏總兵劉國光疏

職方司案呈巡按直隸監察御史薛貞題為昌鎮重地不宜匪人濫據等事奉聖旨兵部知道欽此看得巡關御史薛貞題參昌鎮總兵劉國光貪污不職亟行罷黜一節為照昌鎮係陵京重地特設大將蓋冀其撫循士卒鞏固疆圉乃總兵劉國光籌畧無聞貪婪有據坐占幾空營伍在在寒心虛冒動計萬千人側目怨讟已深奚取司命廢弛日甚有愧登壇既經題參前來相應依擬覆請合候命下將劉國光革任回衛遺下員缺臣部即會官刻日推補等因

覆山西巡按劾奏總兵張萬邦疏

職方司案呈巡按山西監察御史王國楨題為貪險帥臣不堪重鎮等事奉聖旨該部知道欽此看得山西巡按王國楨題參山西總兵官張萬邦不職要行革任回衛一節為照三關夙號重鎮所恃以統率將士彈壓虜酋者惟總兵官是藉張萬邦貪殘多怨刻薄寡恩心如蠍而性若狼罔恤三軍命脈巧為扣而明為嚇惟工一味誅求部伍心離軍兵髓竭幾致脫巾之變豈堪仗鉞之司既經按臣題參前來相應覆請合候命下將張萬邦革任回衛遺下員缺臣部即會官刻日推補等因

遼左夷情疏

本月初四日酉時准遼東巡撫李維翰塘報閏四月初一日辰時據署中協副總兵事龔念遂稟稱本年四月二十七日辰時據署瀋陽遊擊事胡咸甯稟稱本月二十五日寅時分選差丁夷等於本日從撫順等處哨探達賊有無結聚回巢情形至四月二十六日午時分據各夷到營供稱哨至撫順關口並無達賊瞭見離邊約有二三十里等情看得奴酋蓄謀既久用計必深况彼得志益驕乎今雖暫退或姑為緩我或別有所圖皆未可知也除行道將嚴加偵探隄備外理合再塘報等因到臣看得奴酋計陷撫順盤踞不去其意叵測臣等始慮援兵在千里外不能猝至遼瀋真有累卵之危今據塘報斂兵出口離邊二三十里或佯退以誘我或姑伏以伺我皆不可知也然賊緩一日則我得修備

一日調兵募兵次第俱集遠可恃以無恐及此時而沛發帑金軍中驩呼感奮如投醪挾纊勝氣百倍是皇上費數十萬金錢遠左如增數百萬甲兵也

奉聖旨據報虜衆暫出邊外狡謀叵測沿邊將士尤當十分戒備以防再逞今援兵漸集防剿有資督撫等官還要用心調度隨宜戰守務保萬全如再因循玩寇致有疎虞憲典昭然朕不輕貸爾部便懸立賞格有能擒斬奴酋的賞銀千兩仍予世職其餘有名頭目的都從厚陞賞必期殄滅以靖封疆

欽奉聖諭疏

職方清吏司案呈奉本部送萬曆四十六年閏四月初五日該司禮監太監李恩等于文華門傳奉聖諭遠左失陷城堡隕將喪師損威殊甚該地方官平時失于備禦臨期不能拒堵疎防玩寇罪無所逃爾部便行與督撫各官及沿邊將士亟圖戰守長策各處城堡都要用心防守遇有虜警併力截殺務挫狂鋒旦夕經畧出關援兵四集即合謀大彰捷伐以振國威事平一體陞賞如仍因循怠玩致悞軍機國憲具存決不輕貸故諭欽此恭捧到部送司案呈到部除臣等欽遵聖諭馬上差人申飭該鎮督撫各官及沿邊將士嚴加備禦慎國戰守并補本送兵部備照外所有原奉聖諭一道理合進繳

覆薊遼總督題集義兵停試選重武勇疏

職方清吏司呈奉本部送兵科抄出薊遼總督汪可受題為懇乞破格鼓舞士
民齊心嘗膽以固封守事奉聖旨這所奏虜衆入犯瀋陽顯是黠夷合謀更番
疲我便嚴行鎮道將領等官用心防禦相機截殺毋致疎虞仍傳諭遼左官民
令聯屬宗黨自為戰守共保身家有功的依議陞賞所議科舉聽選諸事着該
部作速議覆欽此欽遵抄出到部送司案呈到部看得奴酋蘊火之毒發于一
旦至于陷城殞將此真異常大變兼以東西諸虜互相煽動狡謀叵測茲欲整
頓遼事捍禦夷虜非大破常格無以聯屬士民之心鼓舞豪傑之氣督臣汪可
受議集義兵以聯民心停試選以固士心重武勇以鼓軍心此三議者即用遼
人以禦遼患蓋管仲所以霸齊武靈所以強趙者也內稱倡集義兵互為守望

自千人以下三百人以上皆授以指揮千百戶名色充領義兵千把總官事
之日防守有功者請量授官職剿殺有功者照軍功事例請授實官或于世襲
此款已奉明旨依議煌煌天語炳于日星無庸再議矣其停鄉會試科等款移
會禮部查議咨回到部該臣覆看人情之愛身家甚于愛功名當此危急之
秋令諸生暫停一科比閭同心以禦外侮度諸生自為計亦應如此第遠士每
科中式額有五名轉盼秋試幾得而失士心或不無缺望今科既不赴試似應
准其來科補中十名則不必懸欽賜之令而士子亦爭奮夫敵愾矣况斬級固
有軍功議爵賞在乎遠之舉人原自不多應如禮部照常會試臣部無庸復贅
夫諸生科試此三年一舉者也且以急難之故暫停况監生吏承一切聽選諸
人獨不能濡忍耶委應概停起送悉令聯屬宗黨自為戰守通候事之日查

果防守有功者移咨吏部從優起選剿殺有功者俱照軍功陞賞此在目前可
為保守身家之計在後日可為涉躐功名之途計亦人情所樂趨者也至選拔
技能倡率武勇一議尤為速遠之急務對症之良方蓋遠人之患夷虜不啻剝
膚矣此時而不獎拔勇猛果銳之士為摧鋒陷陣之用而猶拘攣往例官必世
職資必武科是大盜在門而修揖讓之容也不已迂乎夫以一人而為千百人
所推服此其材力智勇必有過于千百人者矣遞拔而為千百總為中軍夫誰
曰不宜即起自白衣積勞三五年以上有防守功者請得與世職武科一體錄
用其有剿殺功者自有軍功事例在不必為此曹特設一令也此三議皆破格
事計欲保全危遠防捍黠虜不得不為此鼓舞之術以開功名之途而收豪傑
之用既經督臣條議前來相應依議覆請伏候命下云云

奉聖旨這所奏俱得霽安遼急務便行與督撫官依議一體遵行

催點用滇楚巡撫疏

臣惟寓內行省其幅幘最廣者無如楚其疆界最遠者無如滇廣則數澤多通嘗有腹心之慮遠則藩籬易撤豈惟疥癬之憂所恃以控制幽遐銷弭奸宄者官莫重於巡撫其于諸司猶衣之有領網之有綱也即平居無事且不可一日缺官况當滇楚多事之際乎年來皇上慎重官爵如不得已至于巡撫一官未久不點用者頃廷推兵部左侍郎以順天貴州二撫臣請特奉聖諭劉曰梧移駐山海互相應援張鶴鳴亦有土司相構地方有事豈可更移欽此仰見聖明軫念疆事託重撫臣雖在荒裔猶厪睿慮夫此二撫臣即見推陞必候交代地方固未嘗缺官也皇上尚虞有事不令更移湖廣稱皇祖湯沐其重不後于順天雲南為黔蜀咽喉視貴州更急乃二撫臣之告缺久者二年近亦數月矣

猶未蒙點用豈以二省為無事之地耶在湖廣無論宗室之驕橫土司之獷悍
林莽之有伏戎江洋之多逋寇即貴苗患亦既震鄰兵食之計奉旨會議者屢
矣無撫臣誰為主議往時征播征倭嘗調永順保靖土兵為其人矯捷便弓弩
習巉嶮也今議征剿奴酋正合徵調此兵無撫臣誰為主調請點楚撫蓋黔楚
所共利害亦策遠事者所亟望也雲南遠在絕徼四面皆夷往往自相讐殺內
地幾為騷動此猶其小者也武定之變至于攻城挾印則全滇皆震矣爾時撫
臣故在猶有蹉跌况挈兵柄而盡付之一貴踞不解事之鎮臣獨不為西南半
壁慮乎此猶往事也今黔蜀之間水西蘭州攻殺未已正明旨所謂土司相構
者也夫孰非滇之門戶耶大抵西南諸夷窟穴于楚蜀滇黔之間如犬牙之相
錯一方有事鄰境俱動諺所謂一枝搖則百枝動者也撫臣既缺猝有緩急誰

為調度譬操無舵之舟試于不測之淵中流而遇逆風雖操楫者眾亦何濟乎
此闕封疆之事臣承攝樞務職當與聞不敢不以上請伏乞檢發吏部屢疏立
賜點用庶滇楚彈壓有人我皇上亦可釋南顧之念矣

覆宰賽卜兔亥市賞疏

職方司案呈奉本部送兵科抄出薊遼總督汪可受等題為虜酋悔罪求款懇乞准復市賞等事奉聖旨兵部知道欽此看得宰賽卜兔亥始以交通奴酋擅由內地繼以奪獲駝馬殺掠人民題請草賞今二酋接踵悔罪前後送回男婦六十名口輸罰馬牛羊及皮張九九且遣夷人看邊自効此其後善似有可取議將二酋四十五年春賞照舊給與仍嚴行該路道協等官今後當以和款為權宜以戰守為實務一節為照開遼孤懸天末三酋當虜而虜之桀驁者無如宰卜二酋昨因結連東奴擅行內地憤我殺奪人畜輒肆犯搶臣部題奉欽依草其市賞行令督撫相機剿處去後今二酋懼罪俛首乞款獻還原虜漢人六十名口輸罰九九之數差部夷看邊自効且乞款在春經秋恭順原額市賞允

宜准復者也但虜之順逆不常而我之剿撫維時因其狂噬而驅逐之隨其搖尾而養之操縱在我原無定局外假羈縻內脩戰守預圖桑土之謀永弭窺伺之釁在督撫諸臣加之意耳合候命下移文遼鎮督撫衙門將宰卜二酋四十五年春季市賞姑准照舊給與仍嚴諭各酋已後恪遵約束不許擅行內地如陽款陰逆即當閉關革賞聲罪致罰斷不姑息其入市防範嚴脩戰守一切制馭機宜悉聽督撫便宜施行

奏疏卷之十掌部

兵部尚書贈太子太保謚恭敏薛三才

覆議山海鎮添設事宜疏

職方清吏司案呈奉本部送兵科抄出薊鎮督撫按關等官汪可受等題為遵旨添設雄關大帥等事奉聖旨兵部知道欽此看得薊鎮督臣汪可受等題稱東協南兵遊擊坐擁虛銜山海關既設總兵路將可無專設裁此二官薪水就本路公署稍加擴充以置帥府移建昌都司為坐營中軍兼管山海路將事務借援遼餉銀預募東協兵四千合本路額兵共六千而成大營東協四路應即改屬山海鎮與薊鎮總兵分管信地明頒勅書庶無一柄兩操之議為照山海關分界薊遼為神京咽喉之地頃因奴酋犯順議簡大帥踞關扼險一以聲援

遼左一以捍衛薊東誠今日安攘至計第制垂經久議當周密除合用符驗旗牌關防臣部咨行該衙門請給外其分管責任及建置事宜必須從長計議據題本關已設鎮守則路將無用專管南兵既屬各路則遊擊亦為虛擁即以二官所裁薪水人役歸之總鎮併山海路將衙門稍為擴充亦成大帥體統但鎮守總轄四路路將畫守一方則該路叅將必不可少據議移建昌都司改總鎮中軍兼管山海路將事務則鎮體既優路將不廢誠為兩便及查薊鎮西協有振古奇石四營遊兵中協有遵化左右三屯右及鞏重灤陽五營遊兵皆所稱應援之兵在協路之外者也東協止建昌一營耳今議改總鎮中軍兼管山海路事各路猝有緩急首尾或不相應既議入衛班兵改募四千合以本路額兵共得六千之數似應分為二營每營三千人設為山海鎮左右營以左營為中

軍兼管路事右營仍駐四路之中與東協臺頭營相為犄角則灤東之營壘益壯而總鎮之體統益崇矣東路既另設一鎮東協四路自有專屬委應與薊鎮畫地分管不至一柄兩操無容再議薊鎮既分東協四路改屬山海鎮其操賞公費亦應量撥三分之一以佐新鎮幕府之用此則原議所未及者也再照薊鎮以匹馬不入為功臺兵守望勞勩實多故糧餉亦獨厚南兵率因臺為家多有長子孫者曩止議裁南營將官耳千把總及臺兵各懷疑懼惟恐南將既裁遂併裁南人之為中千把總者以漸及於臺兵也道路洶洶前議遂格臣愚以為南將可裁而南營千把總官定須用南人非獨桑梓相聯臂指易使由臺而百總遞拔而為千把總風霜久歷險阨周知其諳練亦足以服人也以此明示南兵不獨東魯帖然即中西二協南營將官亦可一體議裁矣總是一鎮之事

留則俱留裁則俱裁其裁過各官即補以見缺免其赴部聽調於事體人情似為允協既經督撫按關諸臣會題前來臣部稍加參酌覆議上請合候命下施行云云

議登萊海運疏

職方清吏司案呈准薊遼總督汪可受題為速發內帑以定軍心勅通海運以濟軍命事臣惟軍興之事計先足食奴酋犯順廟議主于征剿前者會議餉銀百萬僅足支目前召募捍禦之用發帑一節容臣等酌議另疏申請外海運一議先是科臣官應震請山東青登萊三郡各發銀買米仍調集健兵數千委將官二三員從海上運至遼陽除將米給散遼軍外留船若干遙劄水營一以壯遼陽聲勢一以杜奴賊窺入登萊之意事急亦可登岸救援此于兵食兩資緩急有備擘畫甚悉惟時臣亦請調登州營水兵即令兵船帶米於計亦便復念遼左望援急於星火復令帶米未免稽延一面移咨遼東撫臣暫弛海禁以通登萊之糴前歲山東大荒登萊士民皆告糴於遼臣與遼東撫按計議暫開海

禁數月不惟齊饑得濟抑且遼粟得通此近日救荒時事撫臣得以便宜行之者也蓋山東之登萊與遼東之金復海蓋皆瀕海地方海禁既嚴積粟多壅故粟值甚賤病於傷農目今軍興緊急正當權宜開禁之時或令登萊士民就本道府給批運粟至遼聽其自為糶賣如近日救荒之例可也或遼東差官往糶即用新餉以充糶本如往年救朝鮮之例可也或以涿州被論知州左之似降補遼東運糧通判仍移會東省撫臣借發遼左欠餉數萬兩委登萊府佐各一員會同雇船糶粟再選武職數員督兵領運如今日督臣之議可也總之分途召賣多方轉運聽督撫便宜行事期有濟于軍興之用而已至海船往來止許裝載米豆不許夾帶私貨以杜通夷之實此其責在各地地方官自非不憚煩瑣親自譏詰人情趨利甚於畏法禁令雖嚴竟何益乎既經具揭前來相應酌議

題請云云

覆薊撫移駐疏

職方清吏司案呈順天巡撫劉曰梧題為奉旨移駐薊警頻聞防守宜嚴請命
進止事奉聖旨薊鎮虜警頻聞防守尤宜加謹劉曰梧且照舊整理邊備無致
疎虞應否移駐着該部再為酌議欽此臣惟兵家之形變于呼吸進止之機決
于斯須當奴酋初發難時中外洶洶咸謂遼瀋危在旦夕遼瀋危則一廣之勢
孤而山海以東皆震矣惟時援遼之師如拯溺救焚惟恐不及督臣亟擁兵出
關庶可助遼師一臂而堅其固守之志是日廷推大僚會諸議諸臣具在道臣
熊化首倡此議諸臣反覆辨論竟無能奪也因相與酌議駐遼陽則為孤注不
如移駐廣一可以東西調度此亦應急之着所謂彼一時也已奴酋暫退遼人
得以漸修城守之備援兵募兵次第俱集戰雖不足守則可支督臣出關事屬

可緩所謂此一時也恭奉明旨一則曰相機進止一則曰酌量緩急以為遲速廟算固已先定矣昔光武委寇恂守河內猝聞朱鮪度鞏襲溫即勒兵馳戰過河而還以溫河內之蔽也岳飛鎮襄陽經畧中原偽齊師渡淮張俊恐劉光世楊沂中不能獨當請詔飛併兵東下已韓世忠張俊俱會師即止飛不發爾時豈不知河內為根本之地襄陽為咽喉之區恂之渡河飛之向淮先其所急也事勢稍定恂復還河內飛仍駐襄陽矣今日督臣進止事正類此督臣若出關則順天撫臣不得不移駐山海非獨鎖鑰關門亦以接應督臣也薊門誠重地猶有山險墻臺足恃主客兵馬足防當開遼呼吸存亡之間安得不為此急救之着順天撫臣移駐山海則真保撫臣又不得不移駐易州此又為薊門接應計耳臣浙人也習見浙江撫臣春汛時嘗移駐定海及臣叨撫宣府又習知山

西撫臣秋防時移駐山武此二地皆所謂門戶之區也真保撫臣移駐易州事亦類此今援兵漸集遼事可支督臣奉有相機之旨進止機宜得以便宜自決督臣既不出關二撫臣亦不必移鎮總之因勢應着緩急殊勢則先後異着也但未奉明旨二撫臣不敢自為進止既經撫臣具題及兵科參酌前來相應覆請合候命下移咨二撫臣照舊駐劄本地方整飭邊備相機調度施行

請剿奴酋酌議兵食第一疏

臣惟兵家之勝在於未戰謂算當先定也奴酋世受豢養公然背叛陷我城堡殺我將卒屠戮我人民罪逆通天神人共憤廷議僉謂當殄滅此虜用振國威恭奉明旨曰征剿曰撻伐亦曉然傳布於海內矣先是臣等會議調兵募兵合用五萬時遼瀋危在旦夕徵兵於遠無當緩急故止議就近調募為聯絡防禦之計云爾今廟議已決計剿伐非倣征播征倭事例用兵十餘萬欲以示壓卵之勢收覆巢之功猶是不可幾之數也按朝鮮之役宣大二鎮共挑選馬兵五千山西一千今虜封雖定爭端未已西鎮兵馬固未可多撤一面照前數挑選一面募補此額遼左得援兵之助西鎮無缺伍之虞或亦可行乎往者征倭調浙江水兵四千又召募步兵四千亦今征建州水兵無所用之止調陸兵四千

亦一面召募補足原額此時汛期將畢陸續募補以備明春分布汎地計未晚也又往時南直隸狼山兵亦可調用二千湖廣土兵四千四川土兵六千此輩輕剽便捷登山如飛以當奴酋步兵更為得力至河南毛葫蘆兵往曾調數千征播此皆應議調之兵也又嘗調甯夏鎮城兵一千五百陝西甘固三鎮各借五百而延綏則調入衛兵一千七百又發銀召募一千三百今延鎮入衛兵馬先已調發出關而甯夏陝西甘固諸鎮在在多有兵可借請照往日延綏募兵之議各鎮分募若干併買馬匹各差慣戰將官統領援遠錢糧即於京邊內開銷亦各鎮纓冠之誼也畿內八府先已行文召募河南山東皆近畿地方亦應分投募兵每州縣不必拘定名數但取有勇力技藝者如難其選雖平原獨無亦可也如此徵募幾於海內騷動矣猶不及五萬之數至於潢江一

帶礪徒先徑移書督撫設法招集近得督臣汪可受手書謂已招有數千此則在前議五萬之數者也督臣又謂密諭北關報有精兵萬人併移檄朝鮮亦整兵以待矣朝鮮受我卵翼得保舊封其圖報當不後於北關再祈天語一申諭更嚴重於督臣一紙書也用此十餘萬軍馬豈原議百萬錢糧所能濟事大約行間用一步軍歲費十金用一馬軍歲費二十金此尋常防禦之概也當此危急之秋使人冒鋒鏑蹈白刃非有厚糈豐犒何以得其死力况安家買馬製器等費又在月餉之外故曰數米而炊不可以治三軍倭之後費至七百八十餘萬播之役未及暮年亦費二百餘萬而川湖貴三省民間買馬運米加派私貼之費又不可數計此臣待罪楚中時所目擊者也今遼人能堪此乎一銖一粒勢必取給於公家即以三百萬計獨是畧約之數耳蓋當夷虜交訌之時為剿

滅奴酋之舉必守者自守戰者自戰禦虜者禦虜剿奴者剿奴然後兵力不分而舉事萬全也調募之兵既十餘萬合以遼東堪戰之兵大約不下十二三萬人內以三萬人聯絡東西專備禦虜之用征勦奴酋者可得十萬人總領大將非得四五員不可及查征播八路進兵用大將六員副參二員征倭水陸並進用大將四員是以郡力畢効而收功於一舉今大將自李如栢外合再用四員各隸以叅遊等官六員而經畧標下另設標兵遊擊二員此必不可少之官大將如杜松劉綎官秉忠柴國柱其選也似應再起二三員添註五府僉書以備推擇而副叅遊都等官聽經畧督撫便宜委用凡遠將素負勇畧曾經戰陣廢閒在家者皆可委也其各鎮統領援兵入遼者率多選擇之官亦可酌用也臣部與科道各官更多方諮訪凡立有戰功以註誤投閒者皆起送軍前隨宜委

用有功即復原官功多仍陞職級前議固有起廢一途必攜帶家丁三五百名以上者始得收錄其有慷慨功名而貧不能蓄養家丁者何由自致網羅之目亦不廣矣建議者諄諄以起廢為請此所當申議者也從來大征有監軍有贊畫此在軍中為提綱挈領之官更屬喫緊是在吏部亟為推用有應會同都察院者會疏上請可也他如練禁兵以重輦轂防嚴關以固堂奧布文告以翦其羽翼廣間諜以離其腹心事可徑行或機難盡洩者臣等不敢一一瀆奏惟是徵發之兵幾偏南北續議之餉兩倍前數事體重大非臣部所敢擅議伏乞勅下九卿科道諸臣再加會議詳確覆請施行自奴酋發難以來臺省諸臣各輸忠悃章滿公車凡事關臣部者雖次第施行但未奉批發非所以示止輦之風弘折衝之畧也在昔世廟即恭脩默諸臣章疏批答如流遇有邊警嘗陛見

羣臣面問方畧今邊事告急如此陛下猶深拱大內若無事時言官不補章奏多格雖九重時厯宵旰中外臣民亦何從知聖心焦勞若此乎用人聽言尤今日安攘第一議也

覆遼東巡按議調援兵疏

職方清吏司案呈巡按東監察御史楊一桂題為馳報逆奴情形敬陳目前機宜事為照逆奴犯順遼左貼危先該臣部題議就近調募兵馬業已次第出關而遼左亦編練鄉兵招募勇士漸可為城守之備矣按臣議以薊鎮援兵盡布開瀋寬叢之間一面防守一面脩葺陷失城堡以扼東夷之入路則開瀋可固北關可保誠得捍禦至計惟是撫順一城實逼賊衝若改葺小堡則異日屯兵不多不足有所禁禦若剋期脩復則目前兵力未集又恐反為賊乘似應俟調募兵馬聯絡瀋陽東西足為犄角之勢更得一謀勇宿將以重兵臨之然後賊來可以捍禦賊退得以脩葺更為萬全至於磚灰木植等料不妨先為料理附近會安東州馬根單諸堡如用力不多亦可併力繕葺此正按臣所謂密謀相

度之意是在撫鎮道諸臣酌量緩急便宜調度已耳既經具題前來相應覆請
云云

請剿奴酋酌議兵食第二疏

奴酋背逆自干天誅廷臣建議咸謂不殲此小醜無以威示四夷聖怒赫然特
下征剿之令臣部職在司戎敢不肅將天威咨籌兵食先議兵五萬餉百萬止
是就近調募防捍目前未及於征勦之後也國家舉大事興大役必算無遺策
動不後時然後能一舉而收萬全之功奴酋雖小醜其威力足以吞併諸夷其
材力足以糾連諸虜鳴鏑控絃之衆不下五六萬我兵調募者即以一敵一得
失且未可量况多不習戰之兵乎李如柏生長遼左於奴酋情形甚習具揭到
臣亦謂須得精兵八萬臣部續議十萬併北關朝鮮之兵亦在數內實止得八
萬耳先是臣等會議五萬募兵居其七今已匝月遼左召募尚不滿萬續議徵
調又未奉旨而空言征剿不幾以兵事為戲乎聞遼人曩時應募者一隸兵籍

遂同永軍非甚無聊誰肯以軍遺子孫且糧餉不厚器械不具亦非所以招徠壯士也 前開原聚落本稀招募故難廣甯遼陽海蓋三道若懸令如招家丁之法豐其糧糈而不隸於軍籍鞍馬甲杖等項俱官為製備勇力技能之夫必有出而應募者矣既廣招募又不得不急徵調蓋薊保援兵不過萬餘加以南京登州兵四千五百真保快壯六千止得二萬餘遼左募兵見不滿萬即再募萬餘僅得二萬合之不過四萬人耳非徵兵南北安所得八萬精兵而用之兵勢既盛然後開謀得行而北闕朝鮮之兵始為我用也督臣汪可受貽書於臣謂招一壯丁須得安家銀五兩盔甲器械銀三兩鞍馬之費又須十四五兩而月餉不與焉計募軍二萬費亦二十餘萬矣調兵安家銀近者三兩遠者四五兩各將官家丁亦然以五六萬人計又得二十餘萬先議百萬今止得見銀六

十萬爾大兵既集而糧餉不繼變且虞脫巾何言剿賊哉 夏播州後未及朞費各二百餘萬而民間轉輸不在此數奴酋蓄謀數十年帶甲五六萬東西諸虜互相連結非若楊酋時賊突發於一旦而坐困於孤巢者也故昔之剿播剿 夏賊易而今之剿建夷難東夷之為酋長者數十各擁部落數千異時王杲王兀堂仰逞諸奴猶且奮其螳臂逆我顏行今奴酋吞併諸酋盡奪其部落是昔止一酋之力而今合數十酋之力也故昔之剿諸酋易而今之剿諸酋難臣非不念多徵兵則海內騷動多發餉則國計空虛顧上欲為朝廷伸撻伐之威下欲為遼左規一勞永逸之計不得不摹倣征播征倭故事指陳其大畧如此乃議餉三百萬說者謂是書生數米量羹之見也今祇候十日矣未奉明旨施行臣自惟知識黯淺惴惴懼無能佐軍國大計度奴雖暫退勢且復逞經畧既

至而兵餉未集恐亦難於措手臣又何辭於不早計之罪伏乞檢發臣愚前疏
勅下九卿科道集議當否一切兵食之計預為調度庶廟堂有必勝之策臨事
不致倉皇矣

催補遼陽海蓋二道疏

先為遼左軍興議開登萊海運題奉欽依專責道臣總理則登州一道最為緊
要之官吏部先所推給士中李成名至今未奉俞旨臣部恐轉運遲悞移咨該
部議以原任登州知府今陞山東驛傳道副使陶朗先調補知其前歲救荒曾
身親經理海運也該部以銓印尚封不便題覆臣念事關軍興正擬疏請而薊
遼督撫又報海蓋道臣金礪病勢危篤遼陽道臣顧頤以痰症暴故矣撫順既
陷遼瀋之間不絕如綫稍折而南則金復海蓋諸州唇齒相依憂在震隣如此
時勢道臣日夜拮据猶恐不給乃病者故者一時湊合至委廣甯理刑官以署
道此豈可使聞於奴酋哉日來遼兵募兵僅僅滿萬恐未足補撫順覆沒之數
所恃以召補軍馬董率士民使家自為守人自為戰者惟道臣是賴因循一日

則隳悞一日而銓印尚懸誰為推補此臣等所以皇皇有請也伏乞亟下吏部署印之疏遼陽海蓋二道勅令該部立刻推補併登州一道亦即就近調用庶治兵治餉分理有人岌岌危遼猶可撐拒耳云云

覆紅苗入劫叅處失事官員疏

看得貴州巡撫張鶴鳴題稱紅苗劫殺鎮遠安化會旗等堡殺虜男婦三百八十餘名及燒毀房屋倉廩劫掠牛馬等物失事重大法當叅究要將思石道副使高桂新任免議署總兵事新添叅將龍萬化有廣定斬獲多功量加罰治署清浪叅將事清鎮守備牛可耕署銅仁守備事中軍周承爵俱係該管信地不申嚴防禦一併住俸戴罪立功贖罪又看得湖廣巡按彭宗孟題稱紅苗焚殺屯戶雖隸鎮遠地方實坐銅仁在楚止收丁糧在黔實主防戍守備衛所等官平時無統轄之司臨事無守望之責要將清鎮守備牛可耕免議各一節為照鎮遠乃紅苗出入之區防守倍當嚴密今惡苗承突殺傷多人廬舍倉庾皆被燒燬曾旗等堡遂成坵墟荼毒之慘莫此為甚龍萬化身膺兵柄而不能設奇

策應牛可耕周承爵均任信地而不能先事設防誠如科臣所議各以守備不設逗遛觀望之罪罪之亦不為苛第念黔當用兵之際需人正亟龍萬化既有廣定之功姑從罰治牛可耕雖係楚官業署黔將但代庖遙制事權終自不同姑免戴罪從重議罰周承爵住俸立功猶為輕典思石道副使高桂新任委有可原失事乃其道屬為法受過薄罰何辭撫臣張鶴鳴數載劬勩實多勘定之畧此番焚掠總緣將吏之疎相應免議既經題叅前來相應覆請合候命下將高桂罰俸三個月龍萬化牛可耕各罰俸六個月周承爵先行住俸乃戴罪立功責令擒獲苗首之日另行議處

覆兩廣總督劾奏副總兵劉岳疏

職方司案呈兩廣總督許弘綱題為舉劾防汛將領等事奉聖旨兵部知道欽此看得兩廣總督許弘綱題叅原任分守廣州海防管叅將事副總兵今陞南京錦衣衛掌衛事劉岳貪肆不職要行革任一節為照劉岳逞虎噬狼貪之性恣蠅營狐假之姦惟利是圖以官為市既大彰乎穢跡宜併黜其新銜既經題叅前來相應依擬覆請合候命下將劉岳革任回衛遺下南京錦衣衛掌印員缺另行推補

奏疏卷之十一 掌部

兵部尚書贈太子太保謚恭敏薛三才

覆議水蘭事宜疏

職方清吏司案呈奉本部送兵科抄出貴州巡撫張鶴鳴題為土酋構爭釀禍日深等事奉聖旨兵部知道欽此又談四川巡撫饒景暉題前事通抄到部看得貴州巡撫張鶴鳴題稱黔蜀土司錯處每遇爭殺軍民受害自水西安堯臣病故遺妻奢社輝幼子安位方在襁褓奢崇明乘機欲爭先世賠償水西地土以隴氏係社輝之母奢崇德奢崇儉係社輝之弟崇明之子奢寅起兵趕起殺遂占隴氏崖上崖下地方百里趕逐宗目奢辰母子百姓俱投水西寄住川貴叅將周天祿陰為左袒要將奢崇明照安國亨事例革去冠帶責令取回隴氏

并逃水西百姓仍舊安插故土兩省委道臣勘定原立碑界然後準復崇明冠帶奢寅之惡神人共憤應行兩省撫按會勘正罪革其襲替云云又看得四川巡撫饒景暉題稱水西自安國亨以來垂涎蜀土已非一日今則誘沙梯等假崇德之名以紊亂宗枝陰謀爵土雷安民係劉國用之黨國用先有立崇明之功後有弒崇明之謀被奢寅并其妻挈嬰孩而斃之安民入水西為謀主率兵攻烏箐以致蹂躪夷民罪將何辭若夫以賦正西二里社輝輾轉支吾供報不一而誘引沙梯等混亂宗枝且言崇德為効忠嫡派意欲攘取蘭地陰圖襲替豈知宗圖具在御前西姦何愚發此難端乞將奢崇明薄貸奢寅重加創懲奢社輝并加重治仍行查照會叅情罪會勘若果係蘭司償地照舊管業若不係償地數內無論管業久近俱應退還云云為照水蘭相構各執一方據黔蜀兩

撫疏陳顛末詳哉其言之矣顧黔蜀之處分微有不同則水蘭之紛爭終難結局故自黔撫言奢寅不宜爭正西以賦之地致起釁端併臚列其諸不法狀而欲革其襲替以及其父崇明之冠帶如此則社輝之計遂矣其何以服永甯之心自蜀撫言社輝不宜假崇德崇儉之名紊亂宗派以陰闕其爵土而欲將正以賦二里查非賠償不論管業久近斷歸蘭州如此則奢寅之欲足矣其何以塞水西之口今照兩撫併按臣疏僉謂必須勘明地界以杜後日爭端夫天下無懸斷之事則勘之誠是也但以賦正西之地在水西自社輝始侵占者乎抑自社輝以前安氏所久據者乎在蘭州自崇明始被占者乎抑自崇明以前或賠償或侵奪者乎此則不待勘而可知者也儻自社輝近日所侵自崇明近日被占則蘭州守土自應還之蘭司若侵占不自社輝被占不自崇明則各令照

舊管業不必以久遠之事又開一番爭端所謂以不治治之者也奚待勘哉若夫崇明承襲宣撫屢經兩省結勘撫按會題欽依管事業已多年奢寅係崇明之子非奢寅襲替而誰也水西即有移山倒海之手豈能悖違明旨自行廢立在崇明政不必過為疑懼自生枝節乃亦以野鬼之女辱社輝此如市兒相詬口無擇言水西各目亦何用借此挑激以自快其私也隴氏安氏沙梯沙裁奢辰等併所帶五百餘家幾近二千名口隨住水西終非事體且究竟作何下落應還蘭州安插無疑但奢寅蓄憤既久懷恨日深戎狄豺狼之性能保其不甘心多命乎在社輝誠不必發兵護送致啟釁端在奢寅亦不得陰暗害陰謀又釀禍本嚴加禁戢責在四川撫道矣雷安民傳訓等蘭所深讐而水西獨倍加親昵且藏匿寨中意欲何為無恠乎奢寅得藉為口實也即不必獻出蘭州快

其睚眦之怒斷不可仍留水西終為媒孽之根合聽蜀中提問以撥置之罪罪之水蘭應各無辭耳奢寅驕橫不法即蜀撫亦慮為桀兇之出暫行革去冠帶俟其改圖照例保送此正蜀撫所謂童牛之牯也奢崇明縱子暴橫奢社輝陰謀奪襲均之不能無罪聽兩省撫按照彼中事例各加罰治亦足少示創懲叅將周天祿據蜀平撫按俱謂本弁彈壓地方素稱靜奢寅驟欲發兵亦有禁戢之力相應免議既經各撫按具題及兵科抄叅前來相應覆請合候命下云

云

催點用左右樞臣疏

日者廷推兵部左右侍郎以順天貴州二巡撫請補左缺皇上念地方有事不便更移勅令另推臣等仰窺聖意蓋念樞貳不可久虛欲得立可點用者共圖安攘之策也及改推三邊總督楊應聘河道總督王佐與先所推甘肅巡撫祁光宗山西巡撫陳所學候旨又二十餘日矣未奉檢發臣等相顧惶惑莫測聖意所謂大率樞部長貳多用邊方督撫謂其邊務虜情身所經歷譬之問稼於農問蠶於織也而督撫陞轉必積資累伐如拾級而上前者登則後者躡也且邊方無事之日嘗不多得但非緊急用兵之際督撫官未嘗不可遷徙即得點用例必候地方亦何嘗一日缺官料理耶臣以攝署樞務與聞廷議每會推卿貳多費推敲清明文物之世何遽乏才若此政緣有材而弗用故前後多不接

續正陪嘗至那移氣象遂見蕭索耳如我皇上初政有缺即補九列之地濟濟
充庭司馬署中何至長貳皆虛而今至愚極陋之臣攝此至艱極鉅之任如操
鉛刀而為庖丁代割哉今遼事方殷樞務更極尚書黃嘉善義在纓冠禮不俟
駕業已戒裝在道旦夕可受事矣惟是左右侍郎未蒙點用誰為資謀稱緩急
者國家有事侍郎嘗額外設員乃併額員而靳之甚非所以為國事計也臣叨
在攝樞職掌相關不敢不披瀝以請伏乞軫念邊事緊急樞務重大將吏部原
推兵部左右侍郎亟賜簡用一切邊情長貳共相參贊於運籌折衝豈不綽有
餘裕哉

議請經畧兼巡撫事

職方清吏司案呈奴酋猖獗遼左阨危聖明切拊髀之思臣子切纓冠之義唯
時會議救援慮恐督臣遙制則呼吸難通撫臣兼理則精神不一特設經畧重
臣專以防剿奴酋為責一切機務聽便宜行事至於破城隕將該鎮撫臣自不
得辭其責而時當危急之際未暇議其去留今臺省彈章屢上李維翰亦自請
議處計此時必杜門候旨置一切軍事不問而遼之撫臣雖有若無矣前日即
有撫臣不可無經畧何也軍氣摧敗之餘非特設一重臣不足新號令也今日
既有經畧可以兼巡撫何也閩外戰守之機非專屬一重臣非所以一事權也
况召買兵馬調度兵食巡撫之事即經畧之事事一而官分於官為督員於事
為牽制誠有如科臣所言者即如兩廣總督兼巡撫廣東漕運總督兼巡撫鳳

陽皆今日見行事例則遼撫不必推補即以經畧楊鎬兼管待事平之日照舊另推巡撫撤回經畧此因時制宜謀國之善經也等因到部看得巡撫官原司軍旅之事當國家有大征剿如洮河朝鮮之役必另設一經畧者何也事關各鎮則臂指難使師行千里則鞭腹不及勢不得不另設一官以經畧斯事也當奴酋初陷撫順盤踞其地而又勾連諸虜東西煽動彼時兩河之間在在危急遼左半壁度非孤掌可以獨撐廷議以巡撫料理兵食經畧擘畫征剿蓋做洮河朝鮮大舉之故事也此時若兵勢已集師期難緩經畧方身履行間指麾軍旅一切軍興不得不倚辦於巡撫今我軍尚寡餉亦不繼彼中所日夜經營者惟是募軍買馬儲糧除器為孜孜則巡撫之事居多而李維翰屢被人言杜門待罪勢已難於展布若另推一代者即才望相宜猝難受事勢益至於耽延今

日遼撫之事非楊鎬之任而誰任也迨乎兵馬調募已齊芻糧儲峙已足鎬亦得以從容布置決機進剿計不窘於灌輸勢無虞於反顧更不必復以巡撫參之矣第止稱巡撫則事權壓於總督而聞外之寄不專以經畧兼巡撫則機宜稟於獨斷而軍中之令益肅至於軍興煩費遼餉難支省一衙門省一衙門之費猶其小者也誠當如科臣趙興邦議乞即勅令楊鎬以經畧兼管巡撫遼東事務李維翰令其解任候旨處分此固為遼事計亦陛下將將之微權也事關邊計臣部不容無說而處於此正繕寫前疏遼東塘報適至撫安三岔兒白家衝三堡又同日失陷矣事勢至此撫臣益難於展布伏惟立賜裁斷施行奉聖旨是楊鎬着以經畧兼管巡撫遼東事務寫勅與他李維翰失城喪師本當重處姑着回籍聽勘楊一桂既經論列都察院便另差風力御史一員代他巡按

著作速前去

臣等竊維南都水陸營兵疏職方司案呈南京兵部尚書等官黃克績等題稱南都根本重地荏苒日警先年調兵往朝鮮後旋即題補召募今當仍照先年故事召募浙兵三千名以戒不虞至於入援之兵功成回日仍以三千實水營三千實陸營等因奉聖旨兵部知道欽此為照南都係國家豐鎬舊地長江一帶荏苒時警向設水陸二營官兵正為守衛根本至計頃值遼事孔棘議調赴援水陸兩營一時俱空萬一有警其何以支今南都議欲循例照數募補以備緩急誠屬長慮及查萬歷二十九年題議兩營各以一千八百名為率惟時南京戶部猶以月餉難支至欲暫借資於兵部今因援遼調發之故另募三千補足原數在今日兩營止此三千六百之額異日東事既平援兵撤回未免倍溢原數向戶部乞糧得毋又如

酌補南都水陸營兵疏

職方司案呈南京兵部尚書等官黃克績等題稱南都根本重地荏苒日警先年調兵往朝鮮後旋即題補召募今當仍照先年故事召募浙兵三千名以戒不虞至於入援之兵功成回日仍以三千實水營三千實陸營等因奉聖旨兵部知道欽此為照南都係國家豐鎬舊地長江一帶荏苒時警向設水陸二營官兵正為守衛根本至計頃值遼事孔棘議調赴援水陸兩營一時俱空萬一有警其何以支今南都議欲循例照數募補以備緩急誠屬長慮及查萬歷二十九年題議兩營各以一千八百名為率惟時南京戶部猶以月餉難支至欲暫借資於兵部今因援遼調發之故另募三千補足原數在今日兩營止此三千六百之額異日東事既平援兵撤回未免倍溢原數向戶部乞糧得毋又如

前日之爭執耶合無量募一千四百名併二營剩餘六百名共足二千名暫為目下捍禦之計俟調兵回日聽其漸次簡汰或遇缺不補仍照二十九年題淮事例水陸二營每營以一千八百名為率庶兵無溢額餉有常經既經具題前來相應酌議覆請云云奉聖旨是

請剿奴酋議處兵食第三疏

先是奴酋發難遼瀋之形危於累卵臣等倉皇會議急於防捍以兵五萬餉百萬請即蒙報可已奉捷伐之旨臣部復以兵十萬餉三百萬請至今未奉批發臣等仰窺聖意蓋慎重斯意事計圖萬全非以餉三百萬為過多也朝鮮之役首尾七年費至七百餘萬播州一夏師不逾期亦費二百七八十萬夫此三大役皆近事也一夏資全陝之協濟播州合三省之灌輸朝鮮則因糧於屬國猶費多金若此況以遼左之孤懸一切皆倚辦於內輸者乎即如始議用兵五萬調援者不過薊保之六千五百南京登州之四千五百耳保定續發之五千與真保快壯之六千皆無當於戰守之數者也故督臣汪可受酌議遼左募兵三萬步六馬四除發寺馬三千匹外另買馬九千匹總計招兵買馬日逐糧料併

先調援一萬一千人行糧歲該銀七十八萬三千八百兩薊鎮募兵八千買馬五千三百匹以八個月計該銀一十九萬五千一百四十兩而分發薊密水餉司二萬一千六十兩充援兵行糧之費則百萬之餉分派已盡而援遼各將官之廩給與隨帶家丁之安家糧料及延綏宣大一路行糧不更費十餘萬乎製造戰車藤牌火器等項不又費數萬乎遼東撫臣謂海運既開從登州至旅順有舟運之費從旅順至開遼有陸輓之費更請就近召買多積芻糧不又費二十萬乎撫順當奴酋之衝計必修復此堡然後可以屯聚大兵徐圖防剿之計此又不費十餘萬乎凡此皆必不容已之費目前所急需者也大抵奴酋一日不滅則防剿之兵一日不得撤即藉朝廷威靈一朝殄滅此虜蕩平其巢穴屯兵列戍費更煩鉅耳國家既興此大役自不得惜此煩費慨發內帑以粟紅貫

朽之餘收除克雪恥之效正惟此時臣等每與計臣反覆商確諸可以搜括那借佐助軍興者亦各諮諏一二以備計臣之斟酌類請第中多畫餅無當療饑且救近焚難資遠汲以此不避煩瀆再申前請先蒙發帑十萬臣等不勝手額懇乞再發四十萬兩以足原請之數此尤臣等惓惓得隴之望亦陛下自為宗社生靈計也經畧楊鎬近且出關轉盼秋高擘畫戰守惟日不足錢糧蚤發一日庶得早濟一日之用耳

議應猝兵將以資戰守疏

職方清吏司案呈云云為照奴酋再逞一日而陷我三堡幾同破竹開鐵之藩
籬盡撤遼瀋之形勢益孤岌岌乎危在旦夕矣賊眾動以數萬計而我兵分
布各城堡多者僅千少者伯什即自固且不足况望其能救援乎經畧楊鎬請
先徵兵沿邊各鎮為目前戰守計再調川浙湖廣之兵兼募土著以備征剿臣
部就其疏畧為折衷薊鎮先已調發五千頗挑精銳今再於九標十二路內各
摘家丁百名或摘守臺南兵數百是又挑去精兵二千四五百人矣近日石塘
路馮家谷之報溫酋携有鈎杆攻具似不止零竊而該路邊長空多防禦又不
可無朱萬良此兵將應否調發是在督臣度薊事緩急何如耳薊鎮先議改募
八衛兵八千人此兵現募若干亟應督發出關或以募兵未經練習將此項分

發各營路而挑選舊兵之勇健者赴援如經畧所摘調之數亦一便也宣大山西臣部先日請兵之疏亦嘗倣東征事例各議調數千大同山西撫臣皆遺書於臣謂卜素二酋方治兵相構勢不便於調發即薊鎮燕河路將領張聰於大同督撫即移咨議畱矣臣部先議各鎮以見在兵馬調發而陸續募補正為西鎮非無事之日第論事勢緩急調者不容時刻緩而募者猶可次第集也陝西四鎮去遠誠遠視播猶近往年征播嘗征徵兵於四鎮而劉峙之變遠師亦直趨心夏則東西何嘗不相顧哉但人臣畫守封疆一彼一此不能無分畛域徑調其精銳則兵馬自慮空虛空言乎召補則錢糧漫無着落宜各鎮有辭於遠耳臣請立發新餉二十萬特差本部司官二員齎解各鎮一面摧押兵馬前來宣大山西三鎮各發銀四萬兩以一司官領之徑解至各巡撫衙門而所調兵

馬視經畧疏所請之數聽彼中督臣自為裒益總之三鎮以萬人為率甲馬器械俱備即以原任山西總兵張萬邦原任遼東總兵馬林分統之各聽其帶慣戰裨將所携家丁或千計或百計徑赴經畧標下宣大以十五日為期山西以二十日為期延以廿固四鎮共發銀八萬兩以一司官領之總解至三邊總督衙門聽其分發所調兵馬之數即視其發銀之數總之四鎮以六千為率如經畧所請甲馬器械俱備即以原任總兵趙夢麟統之亦聽其自帶裨將家丁徑赴經畧標下延甯以三十日為期甘固以五十日為期其發去銀兩每兵先給安家銀三兩本等月糧料草本鎮即於額餉內預給一月供其行資而沿途之行糧料草視入衛兵馬應支之數於發去新餉內一頓折給以免逐程關支或致遲滯大率每名安家行糧計費五六兩上下調兵三千餘約費一萬八千兩

其餘銀兩即以補各鎮調去馬價不足聽各督撫移咨兵戶二部於新餉內補給援兵入遼即支遼餉視其原糧之數或照遼丁之額而本鎮之月糧便可另募補額之兵矣各兵有內願者每名月給銀六錢贍其家季終類報戶兵二部亦於新餉內照數發補總不以遼餉累各鎮復有趨趨者乎通計七鎮共該發銀二十萬兩乞勅戶部速為處給俟各省直解到新餉補還太僕寺馬價督臣汪可受見請買馬萬匹臣部正在酌議似難再有責望矣史車二夷安插宣鎮東路者臣待罪宣撫時薊遼督臣王象乾曾調至密雲挑選能控弦者不滿二百今越七八年少者漸長數當逾昔然恐不能滿三百也各夷生有男女俱給有名糧其調去援遼者每名止給賞二兩併月糧俱畱贍其家而行糧視各兵稍加厚馬亦各願為効力第須得一驍將領之耳杜松劉繼官秉忠柴國柱

後先且至初謂大兵未集進剿尚無定期議令杜松暫駐山海官秉忠等暫於五府到任迨調集兵將稍有次第調遣入遼亦為未晚今聞鐵之報急於星火勢難少緩相應趣令各將攜帶家丁星馳出關聽經畧調度即昌平總兵王國棟隨任家丁亦督令一併赴遼此際遼人之望援兵不啻飢渴况各丁皆慣戰先登之士真所謂當什當伯者乎至於山東撫臣標下中軍別鎮項日李長庚遺臣書謂東省比年多盜自本官至而練兵飭武賴以安戢屬臣且勿推陞臣部既調登州防海之兵不便復調其得力之將古北路中軍滿桂督臣汪可受業咨用之潮河川矣其張定蕭陞王宗睦尹克太杜福楊相王進關曹邦輔等不妨移會各鎮督撫徑自檄取此經畧得以便宜行之者也浙江及川貴土兵臣部初亦議調有謂水陸步騎用各不宜跋涉險遠氣亦易竭不如就近調募

而劉綎稟揭至謂川貴兵出入崖谷埋伏攻擊是其長技馬戰堵殺亦稱便捷且鞍馬器械多其自備招集不一月可致數萬皆舊所歷戰統率之人大非烏合之比此亦李牧思用趙人意也臣已兩次馬上差人於中途趣之行令條議詳悉另為覆酌徵調耳浙兵及湖廣水順保靖二司土兵征播征倭時俱曾調用請如臣部前議各調發四千以一驍勇將官統之徑自度遼一切安家行糧或支本處錢穀或動解京軍餉皆有成例可以覆視也臣愚每念南北徵兵海內騷動遼左如募有土著數萬可以撐拒亦不願紛紛調外兵今度此事勢必非遼左兵力所能獨支不得不倣東征事例以調發為請蓋今日救遼非止為遼正為京師門戶計也禦盜者不於門戶之外迨其延入堂奧特梃而逐之豈有及乎既經具揭前來相應亟為題請伏候命下移咨戶部併各督撫衙門遵

照施行謹以遼鎮河東地圖一幅進呈御覽皇上試一披閱則知奴酋吞併諸夷盤亘八百餘里開遼緣邊一帶皆直其部落在在衝急及今不徵兵集餉亟圖所以剿滅此夷遼患不知其所終矣正繕寫前疏經畧楊鎬又報夷虜東西會兵開鐵萬分危急請速發薊鎮各標下家丁三千以朱萬良或張聰領之臺兵亦併摘發二千即以見在南將領之刺期出關揀援未知薊鎮果能如數摘發乞併勅督臣汪可受酌發施行

奉聖旨是這議調各鎮兵馬及先發餉銀以充召補俱依擬行銀着戶部作速處給杜松劉綎等催他星馳出關以備調遣薊鎮家丁臺兵着督臣酌量摘發該鎮虜情緊急救援時刻難緩一應兵餉務要如期速發不許遲延悞事地圖畱覽

覆山東巡撫請暫留班軍防哨疏

職方司案呈奉本部送兵科抄出山東巡撫李長庚題前事等因奉聖旨兵部知道欽此欽遵抄出到部送司案呈到部為照山東登郡逼處海濱防倭是急向設水陸營兵正為齊東門戶計也近因遼事孔棘調遣援兵挑去一千五百名而所餘在營者止寥寥九百名已耳該郡空虛真屬可慮萬一變生叵測其何以支撫臣前海運疏中總總以募兵為請綢繆之慮甚遠募兵則增餉東省當大荒之後不堪加派請留臨清稅銀四萬兩以充募費所為杼柚之慮又甚近該戶部條議前項稅銀解部者總充遼餉則募費益無所出不得已而議留登州京操秋班軍暫為防哨之用撫臣處此亦甚苦心矣此八百四十名登軍踐更京師半供工作似不足為有無而留防本郡以資哨守亦禦侮之一助

也且以本地額軍本支等額餉兵不煩召募糧不費設處計無便於此者既經具題前來相應覆請云云奉聖旨是

奏疏卷之十二 掌部

兵部尚書贈太子太保謚恭敏薛三才

申飭邊防疏

職方清吏司案呈卷查萬曆十八年八月內該本部題為欽奉聖諭申飭邊備事奉聖旨這邊防事宜依擬通行申飭各該督撫鎮巡官着實用心整理邊備不許怠玩欽此欽遵通行在卷今自遼左以迨甘肅延袤萬里所有一切戰守事宜應照每年防秋事例行文各該總督撫鎮等官加謹隄備案呈到部為照九邊聯絡綿亘萬里夷虜環於背腋封豕長蛇每思薦食今逆奴倡亂諸虜生心乘變睨虛勢所必至况秋勁草腓正胡馬驕嘶之候及今不亟為戒備猝有緩急安所措手言念遠事可為扼腕臣謹按各邊情形酌所為制禦之畧不但

修申飭之故事已也夫遼自撫順陷失將卒敗亡廟堂之上日以集兵峙餉為孜孜蓋欲伸撻伐之威洩神人之憤也則遼人之自為計與文武將吏之為遼計自當日夜卧薪嘗膽汲汲於保境固圉以待援兵之至共為剿賊之圖乃志狃於因循氣隳於喪敗奴酋再入又陷我撫安三堡矣夫勾踐以會稽抗吳田單以即墨拒燕 俟外援哉今以全遼之力不能當一奴酋蓋軍實耗而士氣衰非一日之積也薊昌擁護陵京一墻之外即為虜穴異時將吏往往嫗煦狗之虜益驕悍稍不厭其意遂猖獗而起其最黠者如滿旦溫布皆蓄狼豕之心時肆蜂蠆之毒阿拜阿暈又陰陽於其間山谿雖險墻臺雖固未可遽恃以為安也近日馮家谷之警且携有杓杆攻具此其志豈但嚮者狗鼠之竊而已乎宣大直北虜諸部視東西諸虜更號雄強最難制馭自納款以來利我市賞我

遂得以戎索羈縻之然虜以保塞為名漸移帳近我塞下互市諸口習與往來比之遼左亦撫順也卜酋冒順義之空名素囊據市賞之實利方且搆兵相爭夫兩大相搏且虞狂噬況夷狄乎山西與大同邊界相連利害共之儻卜素二酋一動則偏 雁門諸關在在震驚豈得如今日之橐弓卧鼓怡然若處堂之安而內地災旱相仍灌輸不繼老營堡軍幾洶洶脫巾矣前者地震遍及四十餘城多謂兵占此三晉蕭牆之憂也延綏士馬勁於九邊孤山一蹶銳氣頓索即有保甯波羅等捷猶不足以紓前憤吉能陽雖搖尾陰實張牙且猛克奔降折其一臂度吉酋必來要索與之則我且怯而塞降夷之路不與則虜見怒而壞危成之歎歎約不就兵燹復開秋來入寇入尚未可量耳 夏幅帽逆遷兵難櫛比銀定互成諸酋反復無常適伺套長鼻息亦歛戢以求和狼子野心終

不可測乃鎮番果見告矣脫吉能因猛酋內附勾連報復則平虜廣武一帶豈得安枕乎固原去虜稍遠蘆永洮西番虜錯趾時虞反側近日盛夏大雪凍死馬騾以千計此亦一大異也甘肅孤懸天末松海諸虜日有眈眈鎮番之役東作方興糾衆內犯幸我將吏戮力堵截斬馘百餘亦足壯國威而奪虜魄但虜經挫衄蓄忿愈深前當馬弱之時尚有鴟張之計茲值折膠之候能無承突之憂此九邊之大畧也夫天下雖安忘戰則危沿邊將吏其何日不宜討軍實而訓練之况值秋防尤為喫緊雖各邊情形不同戰守機宜亦異總之先事隄防隨機制禦即不必有戰之事而不可無戰之心常留以遠事為前車耳蓋威伸於橫草則虜帳遠徙疆圉不戒而自嚴戰固所以為守也計周於徹桑則牖戶綢繆醜虜無隙之可入守亦所以為戰也設使撫順不以欵市之故遂弛守禦

之備百雉雄城何至一朝遂下此猶曰計陷也又使遠左甲馬精強堵堞完固進可為田單之戰退不失墨翟之守撫安三堡又何至同日俱陷如摧枯拉朽之易哉故遠左之前轍實諸邊之後戒也乃臣更有說焉九邊之防衛在兵而三軍之命脉在餉今太倉一空周寺幾竭內外帑藏搜括無遺各邊之告匱者趾相錯於路項以征剿奴酋徵餉更急司農呼籲不應計無所出非激西江之水以救燃眉將何以了此局乎遠事之善敗關於九邊之安危此臣等所蚤夜憂虞願邊臣共相戒愆者也既經該司具呈前來相應題請合候命下通行云

議處同寺援遼馬價疏

職方司案呈准總督汪可受揭帖題為乞勅發馬價等事又准太僕寺少卿趙士諤揭為邊鎮奏討太多同藏匱乏難應等事為照遼左馬匹近歿於撫順之一戰者不下萬餘而所募新騎兵人各給一馬如督臣前疏所計凡一萬七千三百匹夫補足舊額此應取給於該鎮年例馬價而新兵馬匹除寺馬先後兌發四千二百匹及臣另疏所請八百匹外尚須一萬二千餘匹不得不於新餉內收買而新餉見發者僅六十萬募兵峙糧造車制器等項皆取給於其中計無多贏而留都各部餉銀又未能猝至督臣復請馬價誠非得已寺臣謂馬價歲入有限而該鎮奏討本色至四千二百匹折色至十二萬兩此從來所未有之數但遼左今日之變亦從來所未有之事則不得不大破常格濟此急需即

不能如督臣所請十二萬之數如寺臣所議量給一半亦足佐目前之急但扣抵四十七年年例則無當於新餉之用臣請即以此六萬為該寺明歲助遼之需寺臣陳罔圍涸耗一疏亦云儻事未即結自難秦越相視緩急定有以應如天之福遼事今歲即結該寺不過捐此六萬而止儻明歲尚在用兵此六萬馬價或先或後猶之與人耳至於夷馬筋力壯於內地之馬故諸邊多往市口易買而承委各官殊難其人况買馬萬匹則經理更難費金十萬餘則副託又難此督臣所以再三躊躇而折屐於戶部照磨萬有字之適至也第有字係戶部屬官臣部未便徑請擬合具題伏候命下一面移咨戶部將萬有字坐題前差一面劄行太僕寺於馬價內動支六萬兩薊遼總督臣再於新餉內動支六萬兩湊足十二萬解付萬有字領往宣大市口易馬此雖非戶部照磨職掌總為

國家之事亦從事獨賢之意也云云

奉聖旨是馬價准動支六萬兩着萬有字去所買馬匹務要強壯有裨實用毋得徒取充數

議調薊鎮援兵併議兌周寺馬匹疏

職方司案呈奉本部送兵科抄出遼東經畧楊鎬題為夷虜東西合兵開鐵萬分危迫乞勅薊鎮丁兵刻期出關等事奉聖旨據報夷虜合兵謀犯勢甚急危所請薊鎮家丁及臺兵應否如數摘發着該部速議具欽此奏案照先該經畧楊鎬揭為抵關聞警急議應猝兵將以資戰守事內議調薊鎮各標營路每處摘家丁一百名臺兵數百以將官朱萬良統領一節隨該本部覆議薊鎮先已調發五千頗挑精銳今再於九標十二路內各摘家丁百名或摘守臺南兵數百是又挑去精兵二千四五百人矣今日石塘路馮家谷之報溫酋携有鈎杆攻具似不正零竊而該路邊長空多防禦又不可無朱萬良此兵將應否調發是在督臣度薊事緩急何如耳薊鎮先議改募入衛兵八千此兵見募若干亟發

應督發出關或以募兵未經練習將此項分發各營路而挑選舊兵之勇健者赴援如經畧所摘調之數亦一便也即昌平總兵王國棟隨任家丁亦督令一併赴遼等因業經題奉明旨今督臣議及新募軍兵不習戰陣允換各營路守臺操兵赴遼救援正與臣部前議意見相合兩地俱得實用兵既調往馬亦隨行薊鎮各營路一時缺馬數千匹猝有緩急何以馳援督臣議於太僕寺再允馬一二千匹分發各練以調其性蓋為應急計亦不得不出於此及劄行該寺寺臣趙士諤謂寺馬見在止萬餘匹遼東前已允發三千匹續又議發補允馬一千二百匹京營又該允發三千餘匹是一年而去七千餘匹矣遼東新餉無措先議助餉銀二十萬兩此亦歲入馬價錢糧之數也若再挑允一二千匹寺馬既空脫有不測何從索馬此亦寺臣深長之慮臣部復加斟酌薊鎮挑去馬

數千匹甚屬空虛合再允役八百匹計先後共足五千匹除先允三千匹已經發往遼東外其續允一千二百匹併今議允八百匹俱發補薊鎮各營路挑去馬匹之數不足聽該鎮多方買補蓋今日援遼之役更急於昔年援朝鮮之役拯溺救焚宜切纓冠之誼而今日空乏之問寺又異於昔年充牣之問寺摘瓜抱蔓更懷根本之憂臣部不得不為此酌請也

奉聖旨是挑選援兵着星馳出關不許逗遛悞事應允馬匹俱依擬薊鎮調發數多空虛可慮便行與撫鎮等官將募兵作速抵補訓練加意防守以備他虞

覆蜀省修明事宜疏

看得四川巡撫饒景暉題請十二款除飭吏治重鄉約課積貶行錢法覈採辦
飭學校舉節孝俱係別部掌行聽其徑自查覈外事關臣部者相應開列前件
覆議上請合候命下臣等移文遵奉施行

一看得查虛冒以足兵餉一節大率不肖武弁以營伍為奇貨或人則烏有止
掛空名或軍雖見在籍供濫役營軍之糧糈半入貪弁之囊橐而強有力者遂
得恣意挾持豪門廝役盡充尺籍矣蠹餉蠹軍莫甚於此撫臣所以慨然太息
以清查為第一義也今後營官豪族敢有仍前虛冒等弊查出一體參提仍追
遞年侵冒銀兩入官庶幾宿弊漸消軍伍可實相應如議伏乞聖裁
一看得簡兵器以杜夷讐一節夫士卒不練與無兵同器械不利與無具同今

腹裏州縣之勇壯與衛所之軍丁皆是也蓋亦操練時率以朽鈍之具為塵飯
塗羹之戲已耳此亦何當於緩急撫臣惓惓於練兵除器而責成於將領等官
課成效於殿最焉旌旗營壘庶幾一新乎至責兵巡等道各加督察不時操閱
更得提綱絜領之意相應如議伏乞聖裁

一看得嚴保甲以弭盜妖一節大率弭盜之良法無如保甲而飾治之虛文亦
無如保甲今郡邑長吏所為條上教下者誰不以保甲為諄諄乃盜賊未見屏
跡而白蓮無為之教幾徧於海內此無他故上之勸懲不信而下之觀聽不一
也蜀多狃黨且其族素信師巫亂萌易起敦行保甲尤為禁奸急務撫臣議執
此節課吏治短長實心舉行者雖卑格必超虛文塞責者即他美不錄以此風
示百城之吏有不競相勸勉以臻弭盜戢姦之效者臣不信也相應如議伏乞

聖裁

一看得清軍屯以飭戎政一節國初置有衛所即置有屯田分給官軍自為養
贍此古者寓兵於農之意其後或轉相典賣或併入豪右而屯籍失軍無恆產
則逃徙埋沒之弊多而軍籍亦失此海內通弊不獨四川一省然也夫清軍猶
易清屯寔難軍雖逃移屬族尚有人本族丁絕或有梁充之戶在安得併其籍
而盡沒之惟屯則愈清而愈清自萬曆十九年丈量後屯田之窳為民田者不
知若干矣即不然而事歷數世業經數主問之則不勝株連且有無從究詰者
非獨河南南陽不可問也撫臣按籍而稽原額又按額而稽實在拋荒者必闢
霸占者必清阻撓者必治庇護者必糾清屯已無遺法惟是輾轉典賣或因沿
租佃者糧則照額追徵田則聽其管業庶屯不失額而事無苛搔儻亦所謂下

令於流水之原者乎伏乞聖裁

一看得束土司以靖邊境一節蜀中三面皆夷豺豕牲狸之與隣勢不能無相攬且與荆楚滇黔錯趾而居分疆而治勢又不能相統一姦民惡目從中挑之百相搆百相撼也當事者各聽偏愬之辭遂主先入之見如播界隴爵蘭印等事即兩境不無反唇今水西蘭州又見告矣蜀謂釁起自黔黔亦謂釁起自蜀總之犬羊相搏自其常態即不能盡繩以漢法亦豈可遂長其戎心撫臣請嚴飭各省撫按通行司道各約束其所屬土司妄爭地界有禁誘納叛夷有禁私相讐言殺有禁黨惡助亂有禁輕則從公勘處重則據實叅治深得駕馭之法譬如家之子與隣之子互相詬詈必先撻其家之子故人樂有賢父兄也土司之事各起自把目之相搆其發端甚細萌芽不折將尋斧柯當其發端時亟為禁戢

地方之省事多矣應如前議伏乞聖裁

奉聖旨依議行

覆遼左死事諸臣卹典疏

職方司案呈該巡按山東監察御史楊一桂題為邊關失事重大將士喪敗慘
毒乞行嚴勘以彰軍紀事等因奉聖旨該鎮失陷城堡隕將覆師又殺虜商民
數萬失事重大從來所無李維翰職任封疆全無備禦之策疎防玩寇辱國損
威罪無可逭還着草了職為民其陣亡官軍作何優叙失機并降夷將領作何
議處務期重賞嚴罰以示恩威兵部知道欽此為照令甲之卹死事贈廕祭葬
恩典甚渥蓋所以褒節顯忠激頑磨鈍也夫以大將而至於死敵其所摧敗覆
沒計必不少而朝廷不以此薄其報則近日遼東撫順一戰凡死事諸臣其優
恤之等可衡已總兵張承胤白氣成虹丹心貫日憤醜夷之猖獗誓不俱生痛
城堡之侵陵願以身殉鼓聲不起奮殺氣以彌雄旄頭未銷惜將星之遽隕首

應優恤用慰忠魂雖此番失陷覆沒更為重大以視逗遛觀望何啻徑庭合無酌量比楊照事例贈官賜祠俱照前例廕子世襲消滅一階副叅遊等官頗廷相梁汝貴蒲世芳等三員風雲為氣鐵石為肝遇敵爭奮臂當先賈驃騎冠軍之勇臨難皆舍生取義成狼鏢衛主之忠陣亡中軍千把總等官魏居正等四十六員滅賊之志未酬殉主之心彌厲三軍已奪羞奔北以偷生九原可從甘同日而駢死內應襲頗重光結髮從軍夙稱將種捐軀殉父信是男兒被殺千把總等官王命印等四員值虜衆之逼臨櫻孤城而子守黑雲低壓彌堅不折之操白刃交加共愜如歸之願內千總王命印效張巡之罵賊恥李緒之降胡剗剖如飴生氣猶凜俱應分別褒卹以表精忠管撫順遊擊事備禦李永芳與中軍趙一鶴城守既失禍已慘於萬家妻子俱降罪豈止於一死應如按臣所

議俟剿執之日並行正法如散羊峪守堡官高胤祖棄堡而逃法固當死既已雉經姑免尸戮會安守堡官王廷柱縱放軍民出堡趨避蓋亦自為爰脫計也雖經細打更應提問遊擊尤世功都司僉書卜向績備禦羅萬言先報陣亡續稱重傷是否臨陣先退尚須勘明至於撫臣李維翰毒發養癰寢當屠火雖租荼拮据之交瘁備極苦心而桑土綢繆之不先實叢衆口業已奉旨革職為民再庸再議督臣汪可受數月經營心力已殫千里節制呼吸難通變突起於倉皇勢遽難以責備似應策以需後效者也既經督撫按臣具題前來相應酌議覆請合候命下將張承胤贈少保左都督襲陞三級仍廕一子本衛指揮僉事世襲賜諡立祠加祭塋墓行各該衙門照例議請頗廷相贈都督同知襲陞三級從祠附祭梁汝貴蒲世芳俱贈都督僉事襲陞三級並從祠附祭魏居正樊

英元小四張來陳邦禮曹玉新高志元張登段尚科畢竟榮王世寧劉克楊四
德王大任吳景桂鄧茂桂徐國棟成都何知祿張友才林起鳳解進選曲文魁
江之恒汪烈李進職王道功劉授鄒鍾賢教卜代黃世吉單繼志劉胤擺言代
白應奇李聯芳甯擴胤王廷胤徐可愛張其廉孫遷金階曹大興盛祥耿堯相
梁才各照本職上贈二級仍襲陞二級顏重光贈實授百戶仍准世襲從祠附
祭王命印照本職上贈三級仍襲陞三級從祠附祭王學道唐鏞李弘祖各照
本職上贈二級仍襲陞二級尤世功卜向績羅萬言聽勘明另議李永芳趙一
鶴俟剿獲奴酋之日正法王廷柱行巡按御史提問其陣亡軍丁夷倭共三千
一百五十八名與重輕陣傷官軍俱行該鎮經畧衙門查例分別優卹等因
奉聖旨該鎮襲虜覆軍諸將死事可憫委宜照例優卹張承胤贈少保左都

督襲陞三級仍廢一子本衛指揮僉事世襲賜諡立祠加祭塋墓頗廷相贈
都督同知襲陞三級梁汝貴蒲世芳俱贈都督僉事襲陞三級魏居正等王
學道等各照本職上贈二級仍襲陞二級顏重光贈實授百戶仍准世襲王
命印照本職上贈三級仍襲陞三級內頗廷相梁汝貴蒲世芳顏重光王命
印俱從祠附祭尤世功等候勘明另議李永芳趙一鶴降虜偷生罪不容死
俟剿獲奴酋之日正法王廷柱行巡按御史提問其餘陣亡併被傷官軍著
經畧衙門查例分別優卹餘俱依議

覆李光榮加總兵銜起劉國縉贊畫軍事疏

職方司案呈奉本部送兵科抄出遼東經畧楊鎬題為事任加劇材力難勝等事奉聖旨着該部覆議具奏欽此為照奴酋肆逆夷虜之交方合而遼河中隔東西之勢已分總兵李如柏移駐遼陽廣甯大營兵馬俱渡河而東而李光榮以前一旅獨撐河西半壁虜脫一動責其首尾相顧背腹無虞不亦難乎臣部前疏謂須防虜者防虜剿夷者剿夷然後兵力不分而動出萬全意正慮此但另設一總兵廣甯兵馬既不便分而兩屬而援遼及新募兵馬分布河東猶虞不給又不便撤而之西以此移咨總督經畧衙門會議其便今如經畧議以李光榮加總兵銜仍管西協事移駐遠得以調度錦義諸營兵馬則官不另設而權得專制本官可以獨當河西一面而李如柏益得以專力河東無復西

顧之憂矣此不獨為李光榮積薪計正為兩河分屏計也至於錦衣衛都指揮使張懋忠家承韜畧胸富甲兵臺省文章薦之臣亦雅重其人顧此時所急需於武官者在操戈躍馬推鋒陷陣之事故不難破格起用若軍前贊畫此文墨議論之官參佐帷幄之任縉紳中固不乏人業已題推劉國縉矣似不必廷遣錦衣開此從來未有之例也且國縉起兵部司屬經畧得以分臨之而錦衣堂上官與外鎮督撫得以分庭相抗於體統亦屬不便如懋忠志在疆場期有所表暨以承祖烈而報主恩當不難屈環衛之貴躬胄介之役加以副將職銜俾當一面如吳有孚以錦衣衛指揮簽事起補薊鎮太平路叅將事例似更相應既合經畧具題前來相應覆請合候命下將李光榮加總兵職銜仍管西協副總兵事贊畫一官必不可少乞照吏部原推准劉國縉起陞兵部職方司主事

贊畫軍事張懋忠聽經畧衙門查有相應員缺另行題補施行

覆議薊鎮事宜疏

職方司案呈奉本部送兵科抄出巡按直隸監察御史潘汝楨題為條陳薊鎮事宜等事奉聖旨這條議有裨邊備該部便覆議具奏欽此欽遵抄出到部送司案呈到部看得薊鎮接軫山海於京師為肘腋之區於遼左為唇齒之勢自奴酋發難諸虜生心一切戒備視平時更當加設闕臣潘汝楨奉命閱邊躬親巡歷得於地方耳目之真者具題十事甚於邊防有裨內除勘功宜覆另疏題叙不議外其補練宜速等九事相應列款酌議覆請伏乞聖明裁定臣等遵奉施行

一曰補練宜速自遼事告急薊門兵馬調發援遼者先次五千續又四千其續調者皆新募兵原非薊兵之額而先所調五千非各標營之選士則入衛西兵

之上駟也薊兵堪戰者亦自有數挑去精銳五千此皆當伍當什之兵本鎮亦幾於空虛矣其主兵允宜照額募補即項食援兵名糧而給贍援兵家口者於遼東新餉內支銷則薊餉固未嘗有加也至於西兵入衛者薊鎮止給行糧勢有難於募補今臣部方議撥京營選鋒軍三千餘分防薊鎮此不啻足抵西兵之額矣東事既平援兵撤回此九標十二路內額軍逃故者何月無之或一二月之前預為懸缺以待固不難安頓此數千人也至於訓練一節全在演習弓矢槍砲等器舊兵猶不可一日不與器相習况新兵乎允應如議伏候聖裁

一日戰調宜審各邊皆以斬級為功而薊門獨利用守何也非獨迫近陵京虞於啟釁地則重山為限虜則錯帳而居越險以搗巢豈惟得失難量抑亦順逆難分往戚繼光鎮薊時兩出塞而兩失利朝廷亦置不問至尤繼先紅草溝之

役斬馘三十餘級諸酋信信而起東協遂歲增賞銀二千餘兩此非已時之明驗歟惟是偵探明而隄防密伺其來犯併力夾擊大則如昔年棒椎崖之役小則如近年孤山之役皆所謂漢過不先者也闕臣禁諸將之出搗而勵之以迎擊真得以守為戰之策薊門瞭望全資南兵每臺不過四五名何堪復有摘發而石塘一路滿旦母子巢穴甚近年來屢次窺犯而不獲一逞者朱萬良捍禦之力為多何可調之東援以自撤其藩衛也臣部前疏已明言本官之不可調矣允應如議伏候聖裁

一日要地宜防薊門重山疊障險固足恃而當兩山未合塞水直衝之處虜騎可以橫馳如所謂潮河川喜峯口劉家口者不一而足水勢洶湧不可以城或列木柵或造浮梁亦旋築旋壞非獨時詘舉盈為難也年來脩築邊牆必先衝

口凡兩山斷處皆築有敵臺設有火器為可夾擊一切守禦之備較各處似密
關臣目擊要害更為綢繆之計正如善護身者必於風寒可入之處洵為長慮
合行申飭該鎮凡係衝口可通大舉者增固城壘厚集屯戍多者千人少者數
百協營標營兵馬更番貼防騎射槍砲時常演習此則隱然虎豹之勢也允應
如議伏候聖裁

一曰偵探宜明偵探係軍中耳目薊鎮舊設有直撥橫撥皆是役也直撥夜行
晝伏深入虜穴察其情形橫撥沿邊瞭望遇有聲息接續飛報其晝夜皆食雙
糧而另犒以衣鞋之費所立賞罰格亦甚嚴年來稍稍異矣歟貢日久虜帳漸
徙直撥踪跡不能逃諸屬夷往往賫糶米布之類託處於其帳內而屬夷則轉
以諸虜情形語我故虛實多半其沿邊橫撥又徂習小利或聚而砍板木或散

而採菌甚故亦多為賊夷所撲捉此固細人以身殉利亦緣將領侵尅其糧糶
而賞罰不必信也關臣議以簡選稽查責成各道核其探報之虛實以為賞罰
而臺兵烽軍亦按籍查點中有偷安離信者併罪千把總有占役買間者併罪
將領懸令而致行之將領中千把總等自不敢以苟且塞責矣偵探 有不明
而守望 有不密者乎允應如議伏候聖裁

一曰南兵宜恤南兵以臺為家妻孥俱棲止其上故其守瞭最勤而其食糧亦
最厚南營將官率擅視之諸所股削不饜不止南將之當裁非自今日矣夫四
路臺兵總屬一南將裁一南將而分屬於四路之為參遊為守提者是昔之昔
南兵一而今之苛南兵者九拒虎進狼之說誠如關臣言臣待罪密雲時凡南
兵之補額登臺及造糧散糧等項業已屬之該道路將守提止任稽查不任收

草舊時剝削侵漁之弊庶幾一清至於臺操一節原為演習鎗砲弓矢等技使
手與器常習而南將多假此為占役虛冒之竇查臺時有名無人輒以調操為
辭臣在薊門禁南將之調操止令就近操演或十臺或五臺千把總等官即其
地而較習焉各定以期日辰時就操申時歸臺則操調不廢而守瞭無誤闕臣
所謂畫地而分操之計日而時操之蓋此法也允應如議伏候聖裁

一曰保甲併守沿邊村落星散而居往往為虜所垂涎故築堡以衛之而又虞
堡民不能自為捍禦也又撥軍以防之然則軍之防堡以為民也奈何獨以巡
驚警責之軍而堡民則終夜安枕不與聞擊柝之事乎闕臣議倣保甲之法令
堡民與防軍共編一冊每夜各輪數名上城巡邏上山瞭望有警併力攻打有
功一體旌賞誠得聯絡軍功民守望相助之意第村堡離邊遠者或十餘里近

者或數里從山麓至頂紆迂曲折尚不下數里往來巡邏稍屬不便臣往在薊
曾行馬軍帶砲夜巡之法似與闕臣所議亦相符合蓋山上原有臺烽軍兵為
之守瞭矣而山徑隱伏有瞭望所不能及者零虜常得緣徑而入臣嘗令防堡
馬軍每夜輪流十名每更二名各攜一砲巡邏各徑口遇有警息急放一砲外
則臺烽知覺內則堡軍驚醒可以共相應接而虜聞砲聲亦且抱頭鼠竄矣至
於堡民則令其編立保甲每夜輪流十名亦每更二名周巡堡城之上此則重
門擊柝之意也然非責成有司則保甲之法不立而同仇之誼不奮如馮家堡
民劉大江等同心禦侮卒保孤壘更宜首加旌賞激勸將來伏候聖裁
一曰夷市當防夷之貿易不獨資其板木之利亦借此以羈縻之也無奈奸
民充換手者操狙獍之術以愚木夷而罔市利雖峻法繩不少哀止此啟釁在

內為可虞也而夷人雜沓口外皆賣木為名安知無奸細之窺探狡夷之竊發乘我所不備者乎此則伏戎在外為可虞也闕臣議潘家桃林二口換手自遵化遷安二縣民外不許營充而又為之限人為之限日為之平價所以防奸恤夷者為甚備潘家口與喜峰口相連屯戍相望兵衛頗周而桃林口僅設一守備寥寥軍丁不足以示彈壓臣往與永平道劉澤深議欲移建昌營駐劄其地今闕臣議以建昌營移居南兵營城內以人馬二分輪守桃林以一分仍在建昌防守冷口允得彼此相顧之意第建昌營已經督臣議裁併其兵馬於山海鎮右營遊擊則右營遊擊或仍駐劄建昌而分兵以防桃林或移駐南營而分兵以兩防桃林建昌合行該督撫衙門覆議施行伏候聖裁

一曰資格宜破武弁一途原不可拘以資格無論遠昔即近時名將起自徒步

者指不勝屈奈何以世職武科際海內豪傑之士願自納級一途多以資進而偉門日開真贋莫辨矯枉者一切禁格之而武健勇猛之夫家非世胄名非武科者遂無由以自進當此邊疆多事之秋闕臣所以有破格用人之請也今後各督撫衙門資用納級務詳開其履歷功績如所謂以殺賊為案以戰功為程者其在腹裡曾經手格劇盜者亦得以殺賊論不得止以對偶數語泛為摹寫其非由督撫咨用及雖移咨而無經戰殺賊實蹟者本部概不推用如是則免置之士不以資格拘而銅臭之徒不得冒級進廣羅網之途塞鑽刺之竇事固並行而不悖也允應如議伏候聖裁

一曰軍力宜養三軍之所作者氣也所致者力也將於士卒必居平分甘共苦常鼓其同讐之氣然後臨事蹈火赴湯能奮其必死之力今將官之愛卹軍士

者有幾乎自大帥裨將以至於中千把總等官遞相攫取真所謂層層有竇等等相食而總出於軍士之脂膏夫平時痛癢不相關又從而股削之一旦驅之鋒鏑冀其奮不顧身庸可得乎然禁令非不嚴糾舉非不密而此輩貪目不止者何也凡工於漁獵者必巧於彌縫當事者第見其才能捷給更為延譽則漏網於吞舟而人皆有倖心矣各道之於各將官營伍事務一切相關隨事查察未有不得其情實者如註債帥以上考非不明則不公該道亦無所辭其責以此責成該道不獨可以別將官之白黑且可以窺該道之淺深矣允應如議伏候聖裁

奉聖旨依議行

覆調衝邊將領併催各鎮援兵出關疏

職方司案呈准遼東經畧楊鎬薊遼總督汪可受揭帖為西虜大犯河東官軍堵截出境並議市口緊要將官以代狡謀事為照奴酋所以不惜重幣要結諸虜正欲東西牽我且以疲我也近日迺蠻伯要抄花諸酋分犯大清長勇等處猶幸降夷密報我得預為隄備而總兵李如栢復身先將卒援枹而鼓雖斬馘不多虜已負傷而遁亦足稍挫其氣而少伸中國之威矣獨此十餘虜級不足償我一坐營而虜未遭大創必且挾其連雞之勢逞其封豕之心則伐謀伐交今彼不得勾連於西而我乃可併力於東正臺臣王象恒所謂結虎墩抄花諸酋不可不亟為着力者也乘此戰勝之餘權可為縱橫之計願欲携虜交須先定虜疑非嘗經撫虜為虜所信服者無能操狙公朝暮之術識狼子向背之情

如經畧所稱管鎮武堡遊擊事都司僉書王牧民原任鎮靜守備習知虜之情偽且得虜之懽心卽其三年任內邊境無虞陞任時虜猶戀戀持酒食相送則其才智威信足辨款虜可知也議欲以王牧民與管正安堡遊擊事都司僉書麻承宗互調誠得因材器使之意夫解散西虜正欲專力東夷今時迫高秋奴必大逞而調援兵馬卽近鎮者且未至遼左孤軍何能獨支臣部移咨催促不啻再三而該科復申定限之請各鎮撫豈不急纓冠之誼第恐猶以畛域分念而挑選未必盡精則有兵與無兵同於遼事又何濟焉科臣議各鎮兵馬入遼聽遼東按臣查點非苛責也川貴土兵素為劉綎所用前題奉欽依令其條議詳悉以便調取今據本官揭開數逾二萬若盡調赴遼各兵既多跋涉沿途又苦驛騷臣部復令本官擇其稍近而更精銳者大率不出萬人之數俟續議至

日另為酌請刻期調發至於軍機秘密不容輕洩邇來文武諸臣條議充棟而奴酋探聽奸細實繁有徒機事先洩敵且得預為之備此兵家之所甚忌也臣部亦嘗申禁願輦轂之下法不必盡行自非下一嚴旨如往日征倭時之所禁緝內地之虛實緩急不盡以輸虜乎經畧所以諄諄慮此也總兵標下坐營一官為諸營領袖不可一日缺遊擊蕭伯芝不幸陣亡亟應推補查得神機十營佐擊戴光裕生長西陲習經戰陣橫戈則有直搗黃龍之志披甲則有馳突赤兔之風改以都司僉書管遼東總兵標下坐營遊擊事允稱斯任旣經具揭前來相應覆請合候命下將王牧民以原官調管正安堡遊擊將軍事麻承宗以原官調管鎮武堡遊擊將軍事戴光裕改司僉書管總兵標下坐營遊擊將軍事各鎮援兵伏乞天語再加丁寧臣部馬上移文各該督撫衙門刻期督發赴

遼東巡按御史查點收置經畧軍前隨宜調遣凡係遼左一應軍機不許山人
游客妄言熒惑及抄報人等預傳洩漏在京者聽廠衛巡城巡捕各衙門嚴加
緝拏在外者聽各該御史及管關主事查訪搜檢更乞嚴旨申飭施行

奉聖旨是該鎮虜患方殷援兵未集前議調各省鎮兵馬爾部即再移文馬
上行與各督撫官令作速挑選精銳刻期星夜赴遼聽巡按御史查點勅定
以備調用如仍前玩緩逗遛的着部科及經畧監軍從重參處近來談東事
的多掇拾浮詞無裨寔用相應禁止如有遊客諸人妄言熒惑及擅自抄傳
洩漏軍機的在內着廠衛城捕衙門在外着御史及管關主事嚴行訪緝重

治

書

